

四庫全書

史部

欽定四庫全書

史部

硃批諭旨卷一百二十六之二十三

臣 永瑤 恭 校

編 修 臣 裘 謙 覆 勘

總校官中書 臣 朱 鈐

校對官助教 臣 卜 惟 吉

謄錄監生 臣 謝 蓮 鐸

欽定四庫全書

硃批諭旨卷一百二十六之二十三

硃批田文鏡奏摺

雍正九年七月初六日原任河東總督臣田文鏡

謹

奏為奏明事竊臣伏讀

上諭以直隸山東河南雨澤愆期

聖心焦勞先期籌畫補救之策

特命廷臣酌議各截留南漕米四十萬石以備濟用自
古聖帝明王視民如傷保民若赤未有如我

皇上軫念民依宵旰勤求之深切者

臣

查豫省開封歸

德河南汝寧四府及陳許禹鄭陝五州所屬節次
得雨透足秋禾暢茂惟彰德一府屬并衛輝之輝
縣淇縣延津濬縣懷慶之河內修武南陽之唐縣
泌陽桐柏鄧州內鄉新野舞陽汝州之魯山光州
之息縣未得透雨今於六月二十九日甘霖大沛

凡前缺雨之處俱已霑足據各屬稟稱已種穀禾等項得雨暢發其未種之地詢之老農僉云乘此雨後播種蕎麥尚可豐收等語伏查豫省今歲二麥實屬豐收每麥一石價銀自五錢以上至七八錢不等每斗碾麵十二三斤不等各處早穀高粱不過半月之後即可收割臣愚截留南漕四十萬石運至豫省原恐雨水未足秋禾失望預備賑濟之用今開歸等五府七州連得透雨早禾晚禾俱

暢茂異常西成有慶雖彰衛等處得雨稍遲將來
不過畧減分數不致歉收且彰衛等三府現存穀
七十餘萬石即欲截留漕米預為積貯在此三府
實無需四十萬石之多而他府州縣又可不必分
貯且豫省民人食麥麵小米等項者多食大米者
少今麥麵既賤而高粱黍穀等類又收穫在即比
戶皆已足食此四十萬石大米糶賣既已艱難久
貯又恐紅腐沉米石甚多無倉可貯露囤更非良

策_臣再四思維若酌運米十五萬石分撥彰衛等屬儘足備用而米數既減將來糶亦稍易_臣已將此意與署撫_臣張元懷面言聽其酌奏請

旨遵行_臣於七月初三日自省起程初五日抵衛輝汲縣水次上船目覩沿途秋禾暢茂俱已結穗間有未種之地原係收麥後未及播種晚禾今乘得雨之後有耕種蕎麥者有留至八月種春麥者民情甚安惟汲縣附城二十餘里尚未得透雨我

皇上為豫省民生如此焦勞臣雖卸事何敢不將地方

現在情形據實星馳奏

聞上慰

聖懷并陳愚陋之見是否有當伏候

睿裁謹

奏

覽奏豫省得雨後情形并民間食用習俗足見留心地方候交廷臣確議施行

雍正九年七月二十一日原任河東總督臣田文鏡謹

奏恭請

皇上聖安

朕安卿近日所患全愈較前更覺健勝否新製牙香袋一枚賜卿佩帶

同日又

奏為再陳末議仰祈

睿鑒事竊照河東兩省奉文各截留南漕四十萬石一

案

臣

前因東省得雨果否霑足需米果否可緩

臣

一時知之未確不敢冒昧妄議是以止將豫省情形斟酌撥運之數恭摺具

奏欽奉

諭旨交廷臣確議施行及

臣

至臨清面詢山東署布政

使孫蘭芬據稱東省缺雨處所業已連得甘霖秋禾可望有收似可不必預備賑濟且東省先撥南

漕米三十萬石通倉粟米二十萬石又奉天先運
到米十萬石共六十萬石已分貯德州臨清濟寧
及沿河附近一帶州縣原奉文於今秋易穀貯倉
即有需用之處前項米石儘可動用今若再撥南
漕米四十萬石實無倉可貯露囤非法久貯又恐
紅腐等語臣思東省既現有南漕奉天并通倉粟
米共六十萬石分貯臨河及附近水次州縣備用
有餘且已得透雨秋禾茂盛似毋庸再撥南漕四

十萬石此臣所以不敢不因時變通再為瀆陳者
惟是東省既無需截留南漕則應與豫省撥剩之
米一併仍令原船運回通州交倉但往返需時若
交倉之後復令趕回接運新漕不免急迫臣愚以
為京倉積貯既多南漕似可變通查上年十二月
准漕臣性桂密咨轉准部咨曾有折徵之密議今
若將此截漕省分本年應徵漕米酌改折色起解
其旗丁應得月糧仍酌量給與以示優恤如此則

新漕不必接運漕艘無遲悞之慮旗丁仍有食用
該幫無停運之苦而折徵之省分又得多留米穀
以裕民食亦屬有裨於百姓之事再河南山東本
年應徵漕米臣請改徵穀石留補各屬賑濟之穀
以省買補之煩如來春青黃不接或需糴賣以平
市價即將此穀酌量出糴是以本地之米穀裕本
地之積貯而為本地之備用實於民生有益此皆
臣愚陋之見原欲到京面

奏因廷臣正在詳議此事是以亟為繕摺奏

聞如或可採伏乞

皇上敕交廷臣一併確議具

奏請

旨遵行為此謹

奏

原議大臣速議具奏

雍正九年十月二十六日河東總督臣田文鏡謹

奏恭請

皇上聖安

朕躬甚安

今歲值卿七旬壽期甲子重來又十年人世稱為難得
朕差員至豫頒賜各物卿其領受不必過於張皇令人
遠接此番恩賚應具疏題謝俾天下後世知朕優禮大
臣之意也

同日又

奏為欽奉

上諭事竊查今歲夏間直隸山東河南三省偶因雨澤

愆期我

皇上軫念民依

特命截漕備用及甘霖普被之後猶恐得雨稍遲之州

縣收成歉薄

諭令該督撫秉公查勘若有應行散賑之處悉心辦理

臣

陞辭之日又蒙

諭旨諄切臣欽奉

聖訓敬謹辦理臣

查豫省開歸河南汝等五府陳許禹

鄭陝光汝等七州俱屬豐收惟河北彰衛懷三府

屬得雨稍遲有收成歉薄之處臣自京回豫隨密

諭彰衛懷知府將各屬實在歉收地方確查密報

去後茲據彰德府知府萬國宏衛輝府知府馬騏

雲懷慶府知府祁瑛將收成歉薄之延津汲縣新

鄉淇縣原武武陟修武湯陰安陽等縣稟報到臣

臣查延津等九縣雖收成均有五分以上至六分者例不成災但秋收既薄當隆冬歲暮以及來春青黃不接之際不免有艱食之窮民臣謹仰請

聖恩自今冬十二月及明年正二兩月共賑濟三箇月每月大口賑米一斗五升小口賑米七升五合一米二穀計算即合大口每月三斗小口一斗五升之數臣已密諭各該縣於目下查點保甲之時

將實在貧戶姓名口數默為登註造具清冊臨時
按冊給賑既不假手鄉地自無遺漏濫給之弊而
實在窮民均霑實惠其動用米數賑過戶口俟事
竣日照例題銷再此項漕米除賑濟動用外其餘
均應易穀貯倉以免陳腐臣查延津等九縣雖經
請

恩賑恤然糧價不免昂貴又臨漳武安內黃輝縣濬縣
滑縣獲嘉林縣涉縣等九縣雖收成較勝於延津

等九縣然不及河以南之豐收糧價亦昂臣擬分別借糶以濟民食以平市價借者於明年麥熟還麥再於秋間易穀糶者存貯穀價俟明年秋後買穀總期閭閻蒙接濟之惠漕米無浥爛之虞臣與司道等官復加商酌無異謹繕摺恭

奏伏乞

皇上訓示遵行再今歲東省亦有歉收之州縣其應賑應借應糶之處臣已札致撫臣岳濬令其就近斟酌

酌辦理請

旨遵行合併陳明謹

奏

區畫甚屬允協照所議行

同日又

奏為據實覆奏事案查東省雍正八年

大計屆期

臣

因司道府廳等官各因查災散賑公出

而州縣及教佐雜職亦各在本境分辦賑務奏請

展限仰蒙

聖恩准於次年舉行欽遵在案今雍正九年正當補行

臣自應與撫臣矢公矢慎詳加甄別以副

大典茲接撫臣岳濬來字欲將本年補行

大計再寬一年業經繕摺具奏欽奉

硃批與臣商酌會題并另移疏稿到臣竊思臣與撫臣

俱係在任年久且東省今歲竝無應行展限之事

難於措詞題請即部議亦恐無例可援再查

計典之制自司道以至府州縣印佐教雜等員無一不當加謹考覈以昭彰瘅之公今撫臣疏稿內止就知府知州知縣而言且云任事不及一二年及調署新任正在試看等語臣查保薦卓異必須歷任已滿三年之員至於干犯八法竝無在任未久得免考察之例且東省屬員有干八法者正不乏人何可因此而遂寬

計察至云事蹟顯露可以不時舉劾查府州縣中一

有才能出衆者或題陞或調補一有庸懦不職者或叅革或改教各省莫不皆然何年不當如是則是各省之

大計皆可因此而停而黜陟之

鉅典又於何年而補再大小屬員惟知縣以上可以不時保薦至於佐貳首領教雜等微員例必屆

大計之期方得選舉一經停止則此等微員中即有合例應舉之賢員已不能仰邀卓異其雖不合例

而堪膺附薦者更何所希冀至於老病不職之輩
皆得倖免而姑容殊非所以示鼓勵而嚴創懲也
臣不敢冒昧合詞會題謹據實覆

奏伏乞

皇上睿鑒訓示遵行謹

奏

所見甚是前據岳濬摺請寬限所以批令與卿商酌也
考察大典自應照例舉行移文令伊知之

同日又

奏為據實覆奏事竊臣於雍正九年十月初六日准

山東撫臣岳濬鈔奉

皇上硃批該撫臣奏請改徵漕穀減收耗米一摺欽奉諭旨與田文鏡商酌行之欽此鈔移到臣伏查漕糧乃天庾玉粒例不改折仰蒙

皇上軫念河東兩省今歲夏間得雨稍遲收成未免歉薄將雍正九年漕糧照一米二穀之例改徵穀石

收貯平糶通省糧民既免舂碾運兌之煩復邀減
糶接濟之益已沐

天恩於逾格矣自應照例正耗竝收原不必再爲推廣

之請以開小民無厭之求也前因豫省漕糧加耗

原署撫

臣

張元懷奏請豁免經

臣

查明每穀一石

雖得碾米五斗六七升及六斗不等然除去碾費

止得淨米五斗今改收二穀原無多取於民且漕

耗關係運費徵穀出自

特恩不過一年嗣後仍應徵米起運一經豁免無知愚民便為藉口以致運費無出臣又思一米二穀雖得連耗在內將來或借或糶斷不能以一石六七斗之穀即作米一石與民勢必仍以二穀作一米散給則不但耗穀無存即正穀必致虧缺是以臣請照例徵收也今東省漕糧事同一例應仍照徵其折色一項每米一石徵銀八錢加耗銀一錢二分應如撫臣岳濬所奏俟起解正銀時除扣用解

費外餘銀解歸司庫留充公用緣係奉

旨與臣酌行事理理合覆

奏伏乞

皇上睿覽訓示遵行為此謹

奏

交部查議俟奏覆到日有旨

雍正九年十一月二十七日河東總督臣田文鏡

謹

奏為恭謝

天恩事雍正九年十一月十八日臣齋摺家人捧回臣

恭請

聖安摺內欽奉

皇上硃批諭旨朕躬甚安今歲值鄉七旬壽期甲子重
來又十年人世稱為難得朕差員至豫頒賜各物鄉
其領受不必過於張皇令人遠接此番恩賚應具疏
題謝俾天下後世知朕優禮大臣之意也欽此嗣於

二十四日

欽差奏事筆帖式阿昌阿齎捧

皇上恩賜至豫臣隨跪迎至署望

闕叩頭謝

恩祇領遵

旨恭疏具

題奏謝外我

皇上盛德在躬太和保合

乾行日健

景福日隆

臣

實惟欣雀躍莫可名狀至臣一介庸愚七

旬衰朽荷蒙

皇上天高地厚之恩已筆不勝書口難殫述茲當犬馬

加齒之辰復蒙

聖恩眷注於總理萬幾之時

特遣近臣至豫

頒賜御書匾額對聯冠袍等件又據阿昌阿敬宣

恩旨并賜臣寶丹臣跪聽祇領之下驚喜欲狂感激涕

零伏念古來明良遇合如堯舜之於皋夔湯文之
於伊呂千古稱為極盛然未聞有如斯

寵錫如斯

榮眷我

皇上聖德神功誠遠超於堯舜湯文而臣之才則不逮
皋夔伊呂之萬一臣之遇則已為皋夔伊呂所未
有又蒙

聖恩諭令具題俾中外咸知史書特載競傳為徹臣獨

得之遭逢超前軼後之盛事是臣希望不及之

異數我

皇上特加之臣不敢自表之

寵遇我

皇上又諭及之臣何人斯而獨蒙此罕見罕聞之

曠典為天下後世共見共聞之

殊榮臣正不知何修而荷

聖主知遇之隆至於斯極此即鏤心刻骨不足以銘感
捐頂糜踵不足以言報連章累疏不足以陳謝也
所有微臣感激私忱謹再恭摺具

奏伏乞

聖鑒謹

奏

覽卿奏謝矣

雍正九年十二月初七日河東總督臣田文鏡謹

奏為據實奏

聞事竊查河南布政使高斌前臣在京時蒙

皇上詢及高斌居官如何之處臣因進京之日高斌尚

未到任其居官如何臣未能知當即據實覆

奏迨臣回豫之後留心體察聽其言論甚屬明白為

人謹慎辦事亦屬實心甄別屬員亦見公當不似

無才之人臣竊私喜因共事未久不敢遽

奏嗣奉

諭旨高斌著以布政司銜授為北河副總河河南布政司員缺著山東糧道徐聚倫補授徐聚倫到豫後高斌再赴副總河之任欽此臣計徐聚倫到豫尚需時日高斌尚在辦理藩司之事臣正可再為試看奏聞旋奉

諭旨高斌署理四川布政司臣隨委糧儲道張建德署理藩司印務令高斌交代明白以便赴任臣正欲俟其起程有日將交代清楚赴任緣由并其居官

之處備悉奏

聞茲復奉

諭旨因高斌奏稱伊母年逾八旬人子之心難以遠離
著將高斌仍留河南副總河之任等因欽此仰見我
皇上軫念臣工推恩錫類之

曠典臣查高斌事無鉅細俱能留心辦理今蒙

聖恩仍留副總河之任臣同在豫省可以不時勉勵冀

其成一

國家有用之材以圖仰報

朝廷所有臣察看高斌居官辦事之處理合據實奏聞伏乞

聖鑒謹

奏

評論高斌居官辦事之處甚是但嫌其才具微覺狹小耳然乃心國家勉圖報效洵屬賢員今又已另用矣

同日又

奏為請停民壯防護之例以收實用事竊查州縣定制原有額設民壯一項久經裁減雍正二年刑部尚書勵廷儀條奏令各州縣揀選壯丁務足五十名之數分派學習以資捍禦緝捕之用仰蒙

皇上軫念文員

敕部議給防護之人嗣經部議即於州縣民壯內挑選兩司各給五十名道府各四十名同知通判各二十五名州縣佐貳酌與四名或六名此誠

聖主愛惜臣工無微不至之至意臣查河南司道府廳
佐雜等衙門共撥民壯一千一百四十七名每年
共支銀六千八百八十二兩山東司道府廳佐雜
等衙門共撥民壯三千四百二十四名每年共支
銀二萬五百四十四兩查各官俱有經制皂快等
役跟隨侍候此等民壯不過於本官轎馬之後隨
從而已竝無別項差使且係各州縣撥送距本官
駐劄衙門遠近不等工食之外毫無出息是以殷

實本分之民皆不願應募而現在充當者俱係游手惰民并貧乏無藉之輩每遇該班逃避躲閃竝恐在外為姦作匪前署廣東布政使王士俊籌及於此

奏請提解工食聽其於本地召募各衙門因有即令別役充數者甚至佐雜等官或將工食入己不復雇募均在不免從前在州縣時聚集一處且有上司不時考驗尚不肯學習武藝今四散於各衙門

更難取齊教習臣竊以為舉凡公所俱在州縣境
內各官出署齊集公所州縣果有強幹民壯上下
皆可資其捍禦無俟分派各衙門致成虛設再查
直隸各省州縣所設民壯亦不必皆用五十名之
多除省城首府所屬大縣仍給五十名外其別府
所屬極衝之州縣酌存四十名次衝三十五名簡
僻三十名亦已敷用請將司道府廳佐雜等衙門
民壯盡行裁汰飭發各原籍地方同各州縣民壯

一併考驗挑選補足各州縣應存名數其餘仍歸里甲編管惟是民壯一項與別役不同伊等亦有修飾弓箭鳥鎗等器械及製辦火藥鉛子火繩之費每名止給銀六兩實屬不敷臣請照禁卒工食之例每名增給銀二兩以作器具之資其所司者止令捍禦城署倉庫護送糧餉罪犯至緝盜一事宜專責捕役非民壯所能應請停免以便專心學習責令營員照例會同地方官按期訓練同知通

判等員暇時下縣查驗俾知警惕務期操演純熟
然不立一勸懲之法則官役皆不知鼓勵臣請民
壯中果有年力精壯勤於學習武藝嫻熟出衆者
即照河工堡夫之例拔入營伍充補守兵漸次拔
戰拔馬得與考拔把總之列俾有進身之階文武
員弁不勤於操練以致技藝生疎照例叅處倘州
縣將曠缺不即召募足數冒銷工食入已查出據
實嚴叅請

旨究擬如此則民壯俱收實用錢糧不致虛費文武均
資其捍禦矣臣未敢冒昧具

題謹繕摺

奏請伏乞

皇上睿鑒訓示遵行謹

奏

民壯一事候發廷臣議覆朕酌定有旨

同日又

奏為據實覆奏仰祈

睿鑒事竊查東省大路仰蒙

皇上天恩發帑興修以便行旅

臣入

覲時跪承

皇上垂詢仰見利濟

天心即民間往來跋涉之微亦無時不上厪

聖懷臣回任後復加查察北自德州劉智廟起南至鄆

城縣各屬自動帑興修之後俱係高平大道兼之

往來日久土性堅實行旅無不歡聲載道感頌

皇仁竝未聞有人稱未便之處惟郟城縣諸葛店北自
土地廟起至河堰止計長三百六十七丈又自河
堰起至沂州交界止計長二百八十丈緣去秋山
水陡發衝決河堰以致一帶大路稍有坎坷臨河
水急難以堅築今於原路之東自土地廟石拉子
起至交界止改築大路較之舊路稍高業已一律
堅平至沂州大路惟有沙漲工段四處人力難施

亦無別路可以改修幸地勢尚高雨水不致為患
再泰安州惟

先農壇東等五處道路山水衝激又有坡水積聚陰
雨難行今相度地勢現在議建石橋各一座准撫
臣岳濬會疏具

題候部覆允至日確估修建臣復寄字與撫臣岳濬
并行司道府州嚴督地方官乘此冬晴農隙作速
修整務使蕩蕩平平以垂永遠所有查明修整緣

由理合據實覆

奏伏乞

皇上睿鑒謹

奏

留心辦理務使一律坦平勿貽行旅以跋涉之勞

雍正十年正月二十八日河東總督臣田文鏡謹

奏為恭請

聖安仰祈

睿鑒事雍正十年正月二十八日接准部咨一件欽奉

上諭事伏讀

上諭擬於正月祈穀之期虔禱

上帝以迓

天和乃朕躬偶感風寒醫家奏請避風靜攝是以未曾躬

親祀典等因臣跪讀至此犬馬愛

主之心實深眷戀縈結寤寐夙夜靡寧伏願

皇上保合太和天行日健臣不勝虔切之至至於數月

以來各屬報得雨雪未獲普遍臣自當遵

旨敬謹修省悉心訪察先事圖維不敢上負

聖心謹此跪請

聖安仰祈

睿鑒謹

奏

朕躬今已全愈矣時當春令虔求雨澤濟農播種斯為
第一要務近聞豫東兩省吏治甚有不協可傳諭岳濬

共相誠勗竭誠修省更宜懲貪獎善糾謬繩愆以申明
政教訪民疾苦料檢儲蓄以先事預防庶冀上格

天心化災為福否則不亦有忝厥職大負朕恩耶

雍正十年二月初六日河東總督臣田文鏡謹

奏為恭報豫省得雨日期仰慰

聖懷事竊照冬雪春雨於二麥最關緊要河東兩省自
冬以來各屬雖屢報得雪然尚有未獲均霑之處
正需春雨臣隨飭令各屬查明祈禱在案雍正十

年正月二十八日接准部咨以近京各省雨雪未獲普遍上廕

宸衷特頒

諭旨令_臣等敬謹修省先事圖維仰見

皇上軫念民依

宵旰焦勞至深極切_臣跪讀之下益深悚惕復敬謹

欽遵轉行各屬一體虔誠祈禱茲開封省城於二

月初二日申時起至初四日寅時止得雨五六寸

四野霑足又據開封通屬及歸德府之商邱寧陵
睢州懷慶府之原武武陟河內河南府之盧氏衛
輝府之延津濬縣直隸許州并所屬陳州之西華
商水鄭州之滎澤滎陽禹州之新鄭等處俱報於
二月初二初三初四等日得雨入土三四寸五六
寸不等不獨麥苗滋長而農人乘此雨後又可耕
犁田畝以為播種秋禾之地實屬應時甘雨百姓
無不歡呼載道感頌

皇仁至距省遙遠尚有未經報到之各州縣臣業已飛行飭查俟報到日另行恭

奏外所有開封等處得雨日期合先星馳奏

聞仰慰

聖懷再查此番得雨濃陰連日得雨之處頗廣東省亦應獲有甘霖統俟報到日再行奏

聞合併陳明為此謹

奏

以手加額覽之此番膏雨實大慰朕之憂懷

雍正十年二月十六日河東總督臣田文鏡謹

奏為欽奉

上諭事雍正十年二月初七日接大學士鄂爾泰等札
內開雍正十年正月三十日奉

上諭京師自上冬以及今春未得雨雪即畿輔地方與
河南山東看來雨雪亦少朕與諸大臣恐懼修省潔
誠祈禱竝令九卿等悉心籌畫以防二麥或有歉收

為未雨綢繆之計諒各該督撫自知恪謹

天戒體察民隱以副朕之委任再聞豫省之河北三府上
秋被旱收成歉薄小民餬口艱難此道路所共知者
今當青黃不接之時該督應當速為計議或散賑或
平糶務使民食有資不誤三春力作倘春間雨澤又
復愆期麥收失望則小民連遇歉年必致飢餓失所
甚有關係該督應仰體朕心董率有司實心撫恤從
來年穀豐歉不齊全賴人事之補救不必以旱潦為

諱遇歉歲而能以實情上達使恩澤下逮此即封疆
大臣為國為民之功也爾等可密寄信與田文鏡伊
切勿受屬員之朦蔽倘州縣官員等有隱匿掩飾等
情即行嚴加叅劾以為輕視民命者戒欽此等因到
臣臣跪讀再四感悚無地伏念臣猥以庸材荷蒙
聖主委任臣上年入

覲時仰蒙

皇上面諭救災恤荒之道宜於迅速寬大又貴先事圖

維勿使一夫失所又

諭臣將河北三府歉收之處查明賑恤臣實刻刻在心
回豫之後即宣揚

聖意詳告屬員俾各仰體

宸衷愛惜百姓臣於上年十一月內將彰衛懷三府所
屬歉收之處查明分別賑濟出借平糶具

奏蒙

皇上恩允欽遵轉行在案今奉

諭旨以青黃不接之時

令臣速為計議或賑濟或平糶務使民食有資不誤三

春力作又恐春雨愆期麥秋失望

令臣董率有司實心撫恤我

皇上之軫念民依至深極切臣何敢不悉心經理仰副

聖懷竊查河北彰衛懷三府上年秋雨雖則愆期收成

厚薄不一其收成較薄之彰德府屬安陽湯陰衛

輝府屬之延津汲縣新鄉淇縣懷慶府屬之修武

武陟原武等九縣實在乏食窮民已各賑三箇月
口糧又將南漕出借平糶其收成較勝之彰德府
屬臨漳武安內黃林縣衛輝府屬之獲嘉輝縣濬
縣滑縣等八縣已將南漕出借平糶查賑濟自上
年十二月起至今春二月其應給口糧業經照數
賑完至平糶出借二項自去冬開倉至今源源不
息竝未間斷市價不致頓昂民食不致缺乏此三
府實在之情形也惟是賑濟之戶臣原議止給三

箇月口糧以二月為期但今青黃不接去麥熟之時尚遠似應推廣

皇仁懇

恩再加賑三四兩箇月口糧又上年查賑之時止就彼時乏食窮民開報其家有貯糧者不在賑濟之列然其中有彼時可以度日此時未免告匱者仍恐餬口維艱有誤春作臣請將此等人民量賑兩箇月口糧照例散給便可接至麥收矣倘地方官玩

視民瘼不能實力奉行加意撫恤臣即據實

題叅至南漕米石現在平糶其賑濟之安陽等九縣

新舊錢糧竝懇

聖恩暫為寬緩至麥熟後開徵則民力更紓益戴

天恩於無既矣臣蒙

皇上畀以封疆之重常思民為邦本食為民天敢不仰

體

天心以愛養百姓為首務況我

皇上於總理萬幾之時

屢念三府之民特頒

諭旨詳悉指示臣敢不確察情形實力撫恤寧使百姓
之需

恩過優不使一夫之或有不獲但臣智識淺陋恐計慮
未當謹繕摺覆

奏伏乞

皇上訓示遵行為此謹

奏

當勘災之際防屬員之諱匿於查賑之時杜胥吏之欺
朦此最為要務所宜悉心體究不遺餘力者也

同日又

奏為據實覆奏仰祈

睿鑒事雍正十年正月十四日准山東撫臣岳濬鈔送
敬陳海島要地等事奏摺一扣雍正十年正月初
一日奉

皇上硃批與督臣商酌具奏等因到臣臣伏讀

諭旨仰見

聖明慎重海疆至意臣查撫臣岳濬條奏未嘗非防姦

杜匪之切慮但其於洋島情形尚未洞曉臣既奉

旨商酌敢不悉心籌度計求萬全臣於雍正六年奉

旨兼轄山東臣親到登州週歷其地凡水師巡船出入

停泊之處墩墩鋪礮臺稽查捍禦之所又加詳晰討

論節經備細奏

聞在案今復查考圖案再四思維用敢竭忠摠誠敬為
皇上陳之臣查沙門島在天橋口東北相距登州府城
止六十里係一小島竝非可以灣泊船隻處所惟
有廟島一處在天橋口之西北三十里約距沙門
島五十里上有顯應神妃祠宇因東有長山島西
有大小黑山二島為之翼護凡遇西北風起之時
可以灣船數十隻亦止可暫時停泊若東南風則
又難以停泊矣長山島較大小黑山二島亦屬小

島此三島之下俱不可灣泊船隻撫臣奏稱沙門
島一名廟島者非也至廟島之可以暫停船隻者
亦惟自東省出口前往天津等處糧食商船因是
甫行開出必至廟島設供獻神兼候風潮以便放
出大洋若閩廣江浙商船往北貿易者則順南風
由成山頭一直北上及回船之時則又順北風直
往南下俱於大洋颺帆徑過多不遶道灣入廟島
蓋廟島之下係登膠水師兩營巡哨兵船出入停

泊之所已極謹嚴倘有匪船從此外洋經過官兵
不協力追擒尚干叅究豈容匪船入島乎此來歷
不明船隻可以信其決不敢入若本省商民船隻
自有本省之二十五處口岸盤驗放行又無庸重
複查察致滋擾累至於海船往關東夾帶私參販
往南省一事姦民貪利妄行雖不能保其必無但
臣自兼轄山東以來留心察訪嚴飭稽查從無此
等犯案據臣查夾帶私參乃係犯法之事且又係

貴重之物豈肯寄頓島民之家輕付貧人之手況沿海口岸甚多無處不可上岼若設官止於廟島一處稽查彼凡有夾帶者豈肯復入廟島其從大洋經過各船巡查員役又豈能駕舟追躡於洋面盤驗實屬無益再臣查沙門等五島居民共五百餘家墾種地畝亦止一百餘頃雖各成村落而地非膏腴民皆椎魯不過苟圖生聚於波濤震撼之中稍有騷擾即拋家棄業或入海另覓生涯以致

荒廢田地此又不可不慮及者也臣愚以為島中原係蓬萊縣地方自應仍聽該縣編管若委通判一員帶役四十名每年於四月初旬赴島駐至十月回郡一以稽查船隻一以編管居民則此荒濱僻壤之中儼然成一收稅驗船口岸外而需索商民內而擾累百姓貽害無窮如云文武可以彼此相制則官與將弁不和役與兵丁不輯必從此起
伏查雍正八年欽奉

上諭文員管轄武職武員管轄文職皆不可行等因欽
遵在案今令文武彼此相制亦屬非宜事關海洋
巡防固不可不嚴而撫綏招徠亦不可不慎臣請
仍照舊例外洋責之巡哨官兵內口責之州縣有
司似無庸添此通判一員也緣奉

諭旨命臣等商酌具奏事理臣謹覆

奏伏乞

皇上睿鑒批示遵行謹

奏

所議深中肯綮生一事不如省一事正此之謂也

同日又

奏為據實奏請仰祈

睿鑒事竊臣於雍正九年八月內在京奏請豫省車兵

親子弟姪內選其年力精壯者補伍如不足一千
名之數另行召募充補令與大營之兵一體操演
精銳隨蒙

皇上俞允

面諭演習之法至詳至晰臣又跪奏山東登兗二鎮亦應照式訓練欽奉

諭旨令臣回豫知會撫臣岳濬一例照行臣於九月二

十四日回豫遵即密行知會撫臣岳濬署登州鎮

臣冉起鳳兗州鎮臣曾謨去後茲接撫臣岳濬來

字撫標已選有車兵子弟竝食糧兵丁共一百二十名現在再挑百餘名登鎮各營已選有一千名

充鎮各營已選有一千名豫省南鎮各營已選有
一千名北鎮各營已選有一千名及臣標兩營選
有一百八十名又南北兩鎮募補之步兵一千名
俱各遴委員弁教導訓練弓箭扁刀長鎗短棍藤
牌等件又令一日之間行走數十里并身帶重物
由近漸遠由遲漸速由輕漸重業已如法操練各
兵俱皆感激

聖主教養隆恩踴躍從事現在每日勤習漸至嫻熟已

有五六分成效臣查此等挑選精兵雖不令其克應別項差使然終日步行操演殊屬勞苦且不無鞋襪之費臣再四思維內除馬兵糧餉原屬克裕外其餘步兵各食守糧一分每月止領餉銀一兩米三斗車兵子弟雖蒙

皇上天恩於

恩賞坐糧之外每名每月賞給銀六錢米二斗然既挑入精兵數內者即屬一名正兵除養贍外其於操

演行走之際不無零費口食或致不敷合無仰請
每名月加五錢每年即應增二萬六千餘金若他省比
天恩於各得守糧之外每名每月再賞給銀五錢以資
例推廣所費不貲朕謂坐糧之外加銀六錢又增米二
斗似可養贍家口矣如目覩兵丁果有艱難之狀隨時
量為賞賜俱無不可何必拘定成例耶
核銷庶各兵益加感戴奮勵勤於學習矣抑臣更

有請者東省兗州一鎮如臨清沂州德州高唐泰
安臺莊等營當中東兩大路之極衝汎廣差繁額
設馬步兵丁七千五百六十五名除各官養糧及

派出師車兵外止存營五千九百七十二名今又
挑選精兵一千名其餘存營兵丁實在不敷應差
可否照豫省南北兩鎮之例增募守兵五百名分
撥緊要營汛與現在存營之兵一體操演務使技
藝純熟以供差防之用於營伍不無裨益臣不揣
冒昧據實奏請伏乞

皇上睿鑒批示施行謹

奏

兗州係通衢大道非山陬海澨可比現有額兵五千九百餘名足資彈壓不必增募

雍正十年二月二十五日河東總督臣田文鏡謹奏恭請

皇上聖安

朕躬甚安夙疾盡除矣較之去冬更覺調暢順適特諭卿知自應倍喜也

同日又

奏為欽奉

訓旨據實覆奏事雍正十年二月十七日臣齋摺家人

捧回臣恭請

聖安摺內欽奉

皇上硃批諭旨朕躬今已全愈矣時當春令虔求雨澤
濟農播種斯為第一要務近聞豫東二省吏治甚有
不協可傳諭岳濬共相誠勗竭誠修省更宜懲貪獎
善糾繆繩愆以申明政教訪民疾苦料檢儲蓄以先

事預防庶冀上格

天心化災為福否則不亦有忝厥職大負朕恩耶欽此臣

跪讀之下甫誦至第一句

諭旨不勝踴躍懼忭之至隨即叩謝

蒼穹為四海臣民保護

聖主隆庥再讀

全旨喜躍之後深以恐懼臣查豫省開歸河南汝等五府陳許禹鄭陝光汝等七州業已普降甘霖麥苗

長發惟彰衛懷三府尚有未獲溥霑之處至東省
除登萊青三府并武定濱莒等州各所屬地方自
冬及春各得雨雪原未缺少其濟兗東三府并泰
安東平高唐沂濮曹等州各所屬所得雨雪多寡
不等尚未均霑此皆臣奉職多愆之所致臣查彰
衛懷三府臣已將地方情形并請加賑緩徵事宜
恭摺具奏候

旨遵行其東省濟兗東三府

臣

亦節次移行撫

臣岳濬

署布政使孫蘭芬現在減價平糶貧民不致乏食
幸此三府上年截留漕米尚存七十餘萬石設或
二麥歉收儘足動用臣仍敬謹修省虔誠祈禱將
現在所行政務深自省察并諮詢各屬恐有不便
於民足以上干

天和之處力求改正惟冀廣沛甘霖仰慰

聖懷從來大法則小廉表端則影正豫東二省吏治甚
有不協以致上厪

聖心臣罪難逭乃蒙

皇上天恩不即加譴責

訓誡諄切臣何敢分諉於屬吏竊臣身受

天恩至深極重十年以來竭盡血誠凡有可以仰報

天恩俯慰民望者不敢少惜心力少避嫌怨久在

聖明洞鑒之中若不蒙

皇上保全則雖千百臣身亦不能久膺重任至於今日

臣雖至愚荷蒙

皇上恩遇訓誨如此之隆如此之篤即犬馬禽魚亦知
銜結乃敢少萌負

恩之念則明明在上實鑒臨之矣除敬錄

硃批諭知山東撫

臣

岳濬欽遵外復敬錄一道謹粘

几案之前時時觸目警心竭誠修省仍仰祈

皇上念

臣

庸愚憐

臣

衰老時加

訓示遵行臣不勝感激悚惶之至所有奉到原摺一併

恭繳謹

奏

朕之聽聞容或訛誤

上天監觀豈有差忒即以卿在豫十年統而計之前數年
之雨暘時若近數年之水旱災荒非明證歟

上天感應分毫不爽於斯不凜然敬畏循省愆尤可乎諒
卿居心自應終始未渝第恐精神減退於前或被不肖
屬員所欺蔽耳百凡處加詳加慎為之

同日又

奏為署司未得其人據實奏

聞事竊查山東署布政司孫蘭芬原係河南南汝道經

臣

請調登萊青道蒙

皇上逾格擢用

特命署理山東藩司印務於雍正八年十二月二十四

日到任臣留心體察見其才情尚好辦事亦勤臣

深慶得人感激

天恩於無地雍正九年七月臣進京

陛見跪奉

皇上垂詢孫蘭芬能否勝任臣隨回奏能勝此布政使之任復奉

皇上垂詢伊性甚急臣回奏近來已覺少改奉

旨若如此即堪實授臣回奏好臣自九月回任後正欲

其同舟共濟深藉臂指之助又恐其恃才任性致

悞公務屢行寄字令其就近與撫臣岳濬商酌妥

協至所辦政務或有與臣意見未符者臣即開誠布公明白指示密與商榷總求

朝廷公事辦理得宜不謂該署司自臣進京之後頓改

前修仍以氣質用事臣留心試察凡於屬員賢否

不定於屬員之優劣而出於一己之好惡如試用

劉書委署昌邑縣事務婪贓累累孫蘭芬徇庇該

員密囑承審各官懸案不結及臣回任訪聞飭查

方為嚴審詳叅再如壽光縣知縣楊正弼勒借縣

民銀兩濰縣知縣鄒孟復諱命婪贓經臣訪查孫
蘭芬甚不樂聞猜擬係何人進稟於臣彼即深為
不悅以致各屬避嫌不敢復向臣言一事及至審
實先後糾叅而人言方息又兗州府知府沈斯厚
到任以來才不諳練諸事廢弛各屬解府人犯候
審無期以致拖斃在獄者多臣訪聞行查孫蘭芬
不但不肯揭叅且逢人稱說以為好官明欲與臣
相左又試用通判楊明德委署長山縣少年紈袴

耽於歌唱不理政務縱役橫行經臣訪明密飭孫
蘭芬查察孫蘭芬止將該縣撤回竝不揭報亦無
隻字回覆再東省於雍正九年蒙

皇上天恩撥截南漕奉米原以備一時急需而孫蘭芬
狃於米石不能耐久恐致霉爛賠累急欲出糶一
空屢行詳請減價臣因冬春雨雪稀少又奉有先
事圖維之

諭旨凡事自當預為措辦恐減而又減價值太輕即為

姦牙固戶賤買貴賣致病民食且速急糶完萬一
二麥歉收將來三四五七八等月正需接濟此
時再作無米之炊徒費周章於事無補而孫蘭芬
執說甚堅將臣批令查議之詳竝不置議一字徑
行頂回此其偏執已見者一也再奉

旨於德州臨清建立倉廩或赴直隸買米或留截南漕
存貯以備山東河南兩省不時之需而孫蘭芬竝
不悉心辦理惟恐南漕大米易霉以致賠累議截

山東本省之漕折穀收貯臣以漕運小米止河南山東二省運兌京倉為數不多每年支給

陵糴之後僅存無幾不可不為京倉留一地步且大米雖不比穀石之耐久即暫存一二年亦不至遽霉驟爛如謂北地不宜則通州京倉去東省更北豈獨不懼霉爛且截本省之漕以備本省之用何不即留貯各州縣倉廩一有動用取之甚便而必於臨德二處另建倉廩糜費帑項耶還須遵

旨截留南漕為是經臣如此詳晰開導孫蘭芬始行另議此其草率辦理者一也再雍正九年秋後買補倉穀款項紛繁當此歉收穀貴之時孫蘭芬並不查察各屬穀價之貴賤倉存市賣之有無一例飭買以致存倉舊穀尚多市價甚昂原價不足者有多買之苦累存倉舊穀本少市價未昂原價足買者有不買之空虛臣回任之時見其辦理草率甚為驚駭臣為之酌盈劑虛詳晰指示而孫蘭芬始

照臣檄辦理分案具詳方有頭緒此其草率辦理者又一也以上各案臣皆就其重大而有實據者言至其日行事宜臣所未知者不知凡幾即此數事而觀其徇庇劣員既如此其辦理大案又如彼而又性情褊急舉止躁露將來必至貽誤地方所關甚鉅若不急為奏

聞則孫蘭芬之深負

聖恩即臣之深負

聖恩也臣從前未能深察其人屢行舉奏雍正五年十

一月欽奉

皇上硃批孫蘭芬情性太急終非大器仰見

聖明早已洞燭其疵臣不勝欽服惶愧無地伏乞

皇上鑒臣愚昧宥臣罪譴臣惟有矢公矢慎竭盡愚忠

以仰報

天恩於萬一耳為此謹

奏

此奏是朕謂孫蘭芬不勝任之諭不啻一而再再而三卿乃執迷不悟斯即被屬員欺蔽之明驗今雖覺察具摺論列於心能不抱歉乎既經此一番則凡向日認為可以倚信之員俱當加意體究確覈其實朕所慮者正恐該屬負卿不獨孫蘭芬也切莫錯會事事虞欺時時防詐庶無大謬仍候另旨諭部

雍正十年三月十五日河東總督臣田文鏡謹

奏恭請

皇上聖安

朕躬安適如常屢次詢問卿體近時景況第見奏謝之章而厥疾曾否全愈精神增損若何竝未言及嗣後齋摺人來可據實奏聞以慰朕念

同日又

奏為恭報豫省得雪日期仰慰

聖懷事竊查豫省河以南之開歸河南汝等五府及陳許禹鄭陝汝光等七州自冬至春雨雪均霑節經

臣恭摺奏

聞惟河北彰衛懷三府尚未溥遍霑足民情望雨甚殷

臣欽遵

諭旨竭力修省潔誠祈禱復飭各屬設壇齋戒一體祈求茲開封省城於三月初十日未時得雪起隨下隨化至十一日未時止又十一日亥時細雨密下至十二日丑時復降大雪至午時止除消化外積雪四寸餘連前得雨雪入土共有七寸又據開封

歸德河南彰德衛輝懷慶等府陳許禹鄭等州所屬地方各報三月初十十一十二等日得雪七八九寸及盈尺不等四野霑足入土深透臣於十三日親詣各壇謝

神隨有百姓老幼萬餘人擁至壇前合掌望

闕叩謝

天恩歡聲雷動臣復傳其中老農詢問據稱今歲係有閏月節氣尚早得此大雪融化入土不獨麥苗長

茂即早種之高梁早穀等類亦皆勃發而未種之
棉花早黍早穀芝麻等項又可及時播種實為應
時膏澤臣與百姓莫不感頌

聖德羣呼

萬歲所有開封等處及河北彰衛懷三府得雪日期理

合星馳奏

聞仰慰

聖懷至河北三府得雪之後正可播種秋禾其有無力

窮民不能備辦籽種者臣已飛飭地方官借給籽種俟豐收後交還務使野無曠土農無失時以仰副我

皇上子惠元元之至意合併陳明為此謹

奏

豫省連得雨雪霑足朕曷勝額慶但節候未免稍遲二麥可望豐收與否從前缺雨春麥曾及佈種與否所奏均未明晰

雍正十年三月二十八日河東總督臣田文鏡謹

奏為恭奏東省雨雪并豫省得雨日期仰祈

睿鑒事竊查東省各屬於雍正十年二月初六日以前

得過雨雪經臣奏

聞在案惟因去

臣

駐劄地方路途遠近不一各屬具報

雨雪之文前後參差而到未能隨時彙奏除登萊

青三府及莒濱等州所屬上冬原未缺雪春來亦

未少雨二麥豐收可卜外惟濟兗東三府及泰東

高濮沂曹等州所屬地方雨雪稀少今自二月十一十五十六十九等日三月初四初五初九初十二等日或報得雨或報得雪各三四五寸不等於麥苗俱得滋潤長發亦且得以佈種秋穀目下民間尚有蓋藏市糧不少民情安堵所有東省得過雨雪日期理合奏

聞再豫省於三月初十十一十二等日得有大雪經臣恭摺具

奏之後又據各屬具報於十九二十二十一等日復
得大雨四五六寸不等值雪化未久地土津潤之
際得此透雨入土霑足麥苗倍加茂盛已種之秋
禾俱各長發未種之秋禾俱得播種再開封省城
於三月二十七日天氣濃陰至二十八日丑時起
大雨如注四野滂沱入土深透下至辰時尚未止
息而且濃雲密布雨勢寬廣白叟黃童無不歡呼
載道蓋由我

皇上宵旰勤求至誠格

天是以大雪之後繼以透雨益信天人感應之理神而且

速理合一併奏

聞仰慰

聖懷謹

奏

似此雨雪接續入土透足雖秋禾尚不敢預定二麥則大有可望矣朕不禁以手加額為豫東兩省黎元欣幸

同日又

奏為恭報桃汛平穩工程鞏固仰祈
睿鑒事竊查豫省河工數年以來仰賴

皇上至誠昭格

河神默佑黃流循軌汛水安瀾中泓刷深工程堅固
前因桃汛將屆臣隨檄飭管河道劉永錫河北道
孔傳煥督率廳汛員弁帶領兵夫加意修防巡查
料理茲據河道廳汛等各報稱自雍正十年三月

初十日清明起至三月二十九日止黃河水長一尺八九寸及二尺八九寸今已消落一尺一寸竝未出槽又沁河共水長八尺九寸今已消去七尺七寸凡南北兩岨一切堤埽工程俱各平穩兩河官民莫不踴躍歡呼感頌

聖德惟是轉瞬入夏伏汛即至臣仍嚴飭管河各官敬謹修防外所有桃汛已過工程平穩緣由理合繕摺具奏仰慰

聖懷謹

奏

桃汎工程平穩覽奏已悉今歲夏秋間或恐雨水過多
凡事豫則立及早綢繆為要

同日又

奏為恭繳

硃批仰祈

睿鑒事雍正十年三月十六日臣齋摺家人回豫敬捧

皇上硃批諭旨到臣敬啓跪讀於臣恭請

聖安奏摺內欽奉

硃批朕躬甚安夙疾盡除矣較之去冬更覺調暢順適
特諭卿知自應倍喜也欽此臣跪讀之下踴躍起舞

叩謝

天

祖之默佑而深為四海臣民慶幸從此

天行常健

聖德日躋共戴超堯邁舜之

聖人於億萬斯年矣又於臣欽奉

訓旨等事奏摺內欽奉

硃批朕之聽聞容或訛誤

上天監觀豈有差忒即以卿在豫十年統而計之前數年
之雨暘時若近數年之水旱災荒非明證歟

上天感應分毫不爽於斯不凜然敬畏循省愆尤可乎諒
卿居心自應終始未渝第恐精神減退於前或被不

肖屬員所欺蔽耳百凡處加詳加慎為之欽此臣跪
讀之下仰見我

皇上聖學達天訓明理著

上天之賜應即在臣心之敬弛顯而足據臣敢不凜然敬

畏深自修省惟有較前更加勉勵以補精神之所
不逮庶少盡此犬馬之血誠而已又於臣奏叅山

東署布政司事孫蘭芬摺內欽奉

硃批此奏是朕謂孫蘭芬不勝任之諭不啻一而再再

而三卿乃執迷不悟斯即被屬員欺蔽之明驗今雖
覺察具摺論列於心能不抱歉乎既經此一番則凡
向日認為可以倚信之員俱當加意體究確覈其實
朕所慮者正恐該屬負卿不獨孫蘭芬也切莫錯會
事事虞欺時時防詐庶無大謬仍候另旨諭部欽此
皇上知人睿哲遠邁唐虞實天下臣民所敬仰而誠服
者臣心之抱歉不特今日為然但臣實愚昧每為
屬員欺蔽者總因但取其外才而不能深窺其心

此等處朕亦如卿但不似卿過於信任而不加防範耳
術一見其才情足以辦事即引為臂指之助信任

之深必至歷久方能察識是以每為屬員所誤今
既經孫蘭芬之敗露敢不深自省惕至於屬員之
負臣即臣之上負

皇上矣臣敢他諉并自負臣心自當遵

旨更留一番心神也所有奉到原摺理合恭繳為此謹
奏

奏內云屬員之負臣即臣之負皇上斯語不然凡人之

遷改不常始終異趣千變萬化莫可端倪蓋有力所不能禦智所不及料者但保已身終不被人所愚足矣何能保人之必不我負耶十年以來大臣中負朕者指不勝屈遂謂朕負

聖祖可乎此念被屬員窺破即係自開被愚之門用人一節朕經數次切諭惟不逆詐不逆不詐二語守而弗失庶幾一生用之不竭

雍正十年四月十三日河東總督臣田文鏡謹

奏為遵

旨密奏仰祈

睿鑒事竊查社倉積穀一項自定例設立以來臣於每
年秋收後密飭各屬實力勸輸不論菽粟不論升
斗積少成多而豫省百姓沐浴

聖化無不樂善好義踴躍輸將茲據河南布政使徐聚
倫造冊詳報前來除舊管捐貯社倉穀麥豆高粱
稻穀等項共二十二萬九千八百六十五石零外

又於雍正九年分據開封等八府屬汝陳等七州并所屬彙報新收捐穀八千五百二十三石零蕎麥二石以麥易穀二百二十八石息穀一萬六千三百六十九石零以上共二萬五千一百二十二石零新舊二項應實在貯倉共二十五萬四千九百八十八石查雍正八年青黃不接之時各屬借出共一萬八千八百八十六石零應在雍正九年秋收還倉但上年河北彰衛懷三府秋成歉薄現

蒙

聖恩溥賜賑恤窮民未能如期交還各屬具報還倉尚在參差不齊是以未能核定確數合併陳明伏乞
睿鑒謹

奏

覽奏知道了社倉之設本為利民起見借出米穀當觀地方年歲若何稍覺拮据即停其催納緩至次年交倉亦未為晚萬不可令有司因追社穀而擾累閭閻從前

楚督楊宗仁銳意建立社倉屬員奉行不善只顧目前
迎合急於積斂以致通省嗟怨此人所共知者當切以
為戒

同日又

奏為據實覆奏事竊臣遵奉

諭旨查修禹州黃花觀軒轅祠宇臣當即諭令布政司
委員會同該州知州親至崆峒山逐處查勘將應
行修葺之處確估詳報茲據布政司覆稱查勘得

黃花觀一名逍遙觀自下觀以至上觀凡廟閣殿
宇門樓房院共六十間自前明正統間重修以來
歷今年久每多傾圯殘缺之處以及裝修神像修
理牆垣街路共需磚瓦木植灰煤顏料釘油工價
各等項共估銀一千二百一十二兩零臣隨飭布
政司將臣應支

恩賞養廉銀內照數動支給發禹州先為辦料目下正
當東作方興俟農務稍隙之時即委員監督興工

務期堅固一律巍煥以仰副

聖天子尊崇古先聖王之至意所有逍遙觀估修辦料

緣由理合繕摺覆

奏伏乞

睿鑒為此謹

奏

固係美舉非急務也相度時宜量力為之

同日又

奏為欽奉

聖諭據實覆奏事雍正十年四月初四日臣齋摺家人

回豫捧到

皇上硃批諭旨臣敬啓跪讀於臣恭請

聖安摺內欽奉

硃批朕躬安適如常屢次詢問卿體近時景況第見奏謝之章而厥疾曾否全愈精神增損若何竝未言及嗣後齋摺人來可據實奏聞以慰朕念欽此臣跪讀

第一句

諭旨仰見

聖天子太和保合景福日隆四海臣民額手稱慶至臣
自上年進京之後荷蒙

皇上愛護顧復

賜藥賜醫調理全愈臣回任以來至今半載有餘飲食
如常精神強旺即偶爾咳嗽亦因不能避風所致
竝不為患每日接見屬員審理案件辦理事務操

閱兵丁精神實能應付諸病全愈此皆仰賴

皇上再造鴻恩栽培所致前蒙

聖恩屢次賜問而臣竝未明白

奏及者誠以犬馬微軀不敢上瀆

聖聰茲復蒙

皇上殷殷垂詢臣方敢據實奏

聞但臣自顧何人仰蒙

恩眷臣實感激涕零雖捐糜頂踵亦不足仰報

天恩於萬一又臣恭報豫省得雪日期摺內欽奉

硃批豫省連得雨雪霑足朕曷勝額慶但節候未免稍遲二麥可望豐收與否從前春麥曾及佈種與否所奏均未明晰欽此仰見

皇上軫念民依至深極切臣查豫省如河以南之開歸河南汝五府及陳許禹鄭陝汝光七州自冬至春雨雪時有土膏優渥現在麥苗高至一尺七八寸及二尺餘不等已經結穗十分暢茂豐收可期其

河北彰衛懷三府雖自去冬以至仲春雨雪多寡
不等自三月初十十一十二等日得有盈尺大雪
入土深融復於十九二十一及二十七二十八四
月初二初三初七等日三次連得透雨四野遍霑
麥苗勃發并有結穗者數日後出穗俱全臣前委
令糧道張建德往河北三府監察賑務事完回省
稟稱沿途詢問老農俱稱低窪平原肥地可望八
九分收成其高阜沙岡瘠地可望六七分收成與

臣差人察看并各屬所報情形無異至豫省民俗
大率廣種秋麥竝無餘地留種春麥間有未種秋
麥地畝皆留以播種早黍早穀芝麻高粱豆子棉
花等項自連得雪雨之後民間一律播種早色秋
花青蔥遍野竝無尺寸曠土理合據實奏

聞伏乞

睿鑒謹

奏

覽奏卿疾全愈精神復舊而又野無曠土麥稔可期朕
實欣慰無盡

雍正十年四月二十二日河東總督臣田文鏡謹
奏為據實奏請仰祈

睿鑒事雍正十年四月十九日接准吏部咨欽奉

上諭山東布政使員缺著河南布政使徐聚倫調補河
南布政使員缺著御史鄭禪寶補授欽此

臣恭即叩

謝

天恩轉行欽遵在案然臣有不敢不據實奏請者臣查

河南布政使徐聚倫學問甚優人品端正其勉力

廉隅有志向上臣亦可保其無他惟是布政使一

官職司理財用人綜核通省庶政徐聚倫自蒙

天恩陞授以來臣見其所辦事務雖無失誤然間有未

甚老練之處皆由閱歷未深之故臣以為與臣同

城可以不時指示開導引進成全資其佐理茲蒙

聖恩調補山東布政使雖同在臣統轄地方而距臣千

里之遙公牘往來每需時日究不若豫藩之日在
臣左右可以朝夕提撕之為妥便臣又查鄭禪寶
前任長蘆鹽政時臣於雍正六年前往山東查海
該員亦因公在省與臣同辦鹽務鄭禪寶才識兼
優辦事明敏彼此相較徐聚倫優於學行鄭禪寶
長於政事在鄭禪寶似可以離臣稍遠亦能勝任
臣不揣冒昧請將鄭禪寶調補山東布政使徐聚
倫仍留河南原任似此一轉移間不特人缺各得

其宜即臣與撫臣岳濬亦共收臂指之助矣臣為
兩省政務重大起見可否如斯伏乞

皇上睿鑒欽定施行謹

奏

所請甚是候另有諭旨

硃批諭旨卷一百二十六之二十三